

江都縣志卷之十五

江都縣知縣

五

湘

重修

鄉賢

鄉先生歿而祭於社謂足以程士表民也進而祀之膠庠之間則尤儼乎入聖人之門矣舊志既次名宦傳而鄉賢則闕焉得毋畧乎夫君子之流風餘韻猶有存者入其境則想見其人語曰先民既沒而德音不忘亦賴之於見述也爰採其散見者彙輯之庶幾開卷粲然後之人亦將思所以謀不朽之事云志鄉賢

江都縣志

卷之十五 鄉賢

祠祀郡邑鄉賢者共八十有一人

秦召平秦封為東陵侯秦亡為布衣種瓜長安城東瓜有五色甚甘美因稱東陵瓜

漢應曜操履純篤以經術名漢初與四皓同徵不起時人為之語曰商山四皓不如淮南一老

劉瑜字季節少好經學尤善圖讖天文厯算之術州郡禮請不就延熹八年太尉楊秉舉賢良方正至京師瑜上書陳事言中官比肩裂土有乖開國承家之義女嬖充積第舍增多窮極奇巧州郡官府各自考事奸情賂賂皆為吏弭又陛下以北辰之尊私幸宦官之舍因此

暴縱無所不容宜遠邪佞之人放鄭衛之聲於是特詔召瑜問災咎之徵指事案經識以對執政者欲令瑜依違其詞策以他事對八千餘言有切於前竟不能用拜爲議郎及大將軍竇武欲大誅宦官引瑜爲侍中同謀畫武敗瑜並被殺宦官悉焚瑜所上書以爲訛言子琬傳瑜學明占候舉方正不行

吳奉傳見孝友

三國陳矯字季弼本廣陵劉氏爲外祖陳氏所養因曰陳本郡太守陳登辟爲功曹時廣陵爲孫權所圍登令矯求救於曹操矯說操操乃遣兵赴救吳軍旣退操辟

江都縣志

卷之十五

鄉賢

二

矯爲司空掾除相令歷魏郡西部都尉曲周民父病以牛禱縣論棄市矯曰此孝子也表赦之遷魏郡太守時繫囚千數至有歷年矯悉覽罪狀一時論決丕立封高陵亭侯遷尚書令丕子叡立進爵東鄉侯一日叡猝至尚書門矯跪問曰陛下欲何之曰欲案行文書耳矯曰此是臣職非陛下所宜臨也若臣不稱其職請就黜退叡慙回車其亮直如此加侍中光祿大夫遷司徒卒謚貞侯

徐璆字孟玉少博學辟公府舉高第稍遷荊州刺史時董太后姊子張忠爲南陽太守因勢放濫贓罪數億太

后遣中常侍以忠屬璆璆對曰臣身爲國不敢聞命太
后怒遽徵忠爲司隸校尉以相威臨璆至州奏忠賊至
億使主簿詣大司農暴其罪又奏五郡守及屬縣有賊
汚者悉徵按治威風大行中平元年與中郎將朱雋擊
黃巾賊於宛陵破之張忠怨璆與諸閹宦構詞中之遂
獲罪以破賊功得免官歸後再徵遷汝南太守轉東海
相所在化行獻帝遷許以廷尉徵道遇袁術爲所劫術
授以上公璆歎曰龔勝鮑宣獨何人哉守之必死術不
敢逼術死璆得其所盜傳國璽及許上之并還前所假
汝南東海二郡印綬司徒趙溢謂璆曰君遭大難猶存
江都縣志

卷之十五

鄉賢

三

此耶對曰昔蘇武困於匈奴不墜七尺之節况此方寸
印乎後拜太常寺卒於官

晉劉頌字子雅廣陵厲王胥之後也少能辨物理司馬
氏辟爲相府掾奉使於蜀時蜀新平土荒人饑頌表求
振貸不待報而行坐是除名武帝踐祚拜尚書郎典科
律申冤訟累遷中書侍郎咸甯中詔頌與散騎郎白褒
巡撫荆陽以奉使稱旨轉黃門郎遷議郎守廷尉在職
六年號爲詳平轉河內太守郡界多公主水碓遏塞流
水爲害頌表罷之百姓獲其便利尋除淮南相在官嚴
整甚有政績舊修芍陂年用數萬人豪彊兼并孤貧失

業頌使大小計功受分百姓歌其平惠在郡上書言封
建用人諸政優詔答之元康初從淮南王入朝詔爲三
公尚書又疏論律令爲時論所美以光祿大夫卒謚曰
貞

盛彥字翁子少有異才八歲謁太尉戴昌贈以詩彥於
坐上口答之詞氣慷慨母王氏因疾失明彥不應辟召
躬自侍養母食必自哺之母旣病久婢使數見箠撻婢
忿恨伺彥暫出取蟻螬炙飼之母食以爲美然疑其異
密藏以示彥彥見之抱母慟哭絕而復蘇母目豁然復
明彥仕吳至中書侍郎吳平本邑大中正劉頌舉彥爲
江都縣志

卷之十五 鄉賢

四

小中正太康中卒

華譚字今思融之子期歲而孤母年十八守節鞠育之
及長好學不倦揚州刺史周浚引爲從事史太康中嵇
紹舉譚秀才至洛陽武帝親策之時九州孝秀策無逮
譚者同郡劉頌爲廷尉嘆息曰不意鄉里乃有此才尋
除郎遷太子舍人爲郟城令過濮水作莊子頌永甯初
爲郟令境內饑饉傾心撫卹甚有政績再遷廬江內史
加綏遠將軍時石冰之黨陸瑋屯據諸縣譚遣司馬楮
敦討平之封都亭侯譚博學多通著書三十卷名曰辨
道累官至散騎常侍以疾辭位終於家贈光祿大夫子

化字長風討汲桑戰歿

戴淵字若思舉孝廉累轉振威將軍以討賊有功賜爵秣陵侯出爲征西將軍都督兗豫幽冀雍并六州諸軍事假節加散騎常侍鎮壽陽帝親幸其營置酒賦詩祖餞至合肥而王敦舉兵詔淵還鎮京都進驃騎將軍與右衛將軍郭逸分道築壘於大桁之北尋石頭失守淵與諸軍攻石頭王師敗績遂使麾下百餘人赴宮受詔與百官公卿於石頭見敦敦問曰前日之戰有餘力乎淵曰豈敢有餘但力不足耳又曰吾此舉動天下以爲何如淵曰見形者謂之逆體誠者謂之忠敦笑曰卿可

江都縣志

卷之十五

鄉賢

五

謂能言俄遣鄧嶽繆垣收淵害之淵素有重望海內之士莫不痛惜賊平贈右光祿大夫儀同三司謚曰簡弟邈另有傳

唐曹憲仕隋爲秘書學士聚徒教授凡數百人公卿多從之遊於小學家尤邃自漢杜林衛宏以後古文亡絕至憲復興煬帝令與諸儒譏桂苑珠叢規正文字又註廣雅學者推其該博藏於秘書唐貞觀中揚州長史李襲譽薦之以宏文館學士召不至卽家拜朝散大夫當世榮之太宗嘗讀書有奇難字輒遣使者問憲憲具爲音注援驗詳復帝咨尚之卒年百餘歲

來濟護兒少子也字文化及之難濟以幼得免轉側流
離篤志爲文章善議論曉暢時務入唐擢進士累官同
中書門下三品封南陽縣男遷中書令高宗將以武氏
爲后濟諫曰王者立后以承宗廟母天下宜擇禮義名
家幽閒合淑者副四海之望稱神祇之意武后立銜之
謾言濟等忠鯁請加賞慰帝示濟等濟益懼顯慶初兼
太子賓客進爵爲侯帝從容問馭下所宜濟以省徭役
爲對時山東役丁歲數萬人又議取庸以償雇紛然煩
擾故濟對及之二年兼詹事尋坐褚遂良事貶台州刺
史久之徙庭州龍朔二年突厥入寇濟總兵拒之謂其
江都縣志

卷之十五

鄉賢

六

衆曰吾嘗絀刑網蒙赦死今當以身塞責遂不甲冑而
馳敵歿焉年五十三贈楚州刺史濟異母兄恒上元中
爲黃門侍郎同中書門下三品父本驍將而恒濟俱以
學行稱濟有文集行世

李善雅行博學淹貫古今人號爲書簞顯慶中累擢崇
文館直學士兼沛王侍讀爲文選註六十卷敷析淵詳
表上之賜賚優渥除潞王府記室叅軍轉秘書郎乾封
中出爲涇城令坐與賀蘭敏之善流姚州遇赦還居汴
鄭間教授諸生多自遠方至傳其業爲文選學士

陳融廣陵棠邑鄉人有隱德不出鄉而里閭化之年七

十二而卒貞元初呂溫寓居邑中見鄉之人父子長幼各有倫序嘆曰芳蘭所產其草皆香美玉所集其山有光殆有賢者生於是乎遂停車累日周訪故老皆曰有陳融孝慈仁信不學不仕今也則亡清風猶在溫慨然曰先生以純德至行沉輝含耀可無以表彰之哉乃披典校德謚之曰貞晦先生

王播字明敷其先太原人父恕爲揚州倉曹叅軍遂家江都之瓜洲貞元中播舉賢良方正異等補整屋尉歷遷京兆尹時禁屯屬韃佩劍姦人冒之剽劫又貴戚家馳獵近郊爲民害播一切禁止盜無所匿憲宗以爲能

江都縣志

卷之十五

鄉賢

七

進刑部侍郎領諸道鹽鐵轉運使時帝討淮西播裒財用給軍興無乏超擢禮部尚書長慶初出爲淮南節度使仍領使職浚十

舊唐書作七

里港以便漕民賴其利太和

九年入朝拜左僕射累封太原郡公卒贈太尉謚曰敬王起字舉之播弟貞元中擢進士與播並舉賢良方正異等元和末累遷中書舍人數上疏規諫穆宗畋遊拜禮部侍郎宣武押牙李弁叛起與播俱上疏請詔王智興討之卒定其亂以戶部尚書判度支靈武邠甯多曠土奏爲營田以省餽輓歷河中節度使方蝗旱粟價騰踊起下令家得儲三十斛斥其餘以市否者死神策士

怙勢不從寘於法由是膾積咸出民賴以生授檢校尚書右僕射爲山南東道節度使濱漢多塘堰聯屬民弗完治起至部修復遂無凶年會昌中命典貢舉進尚書左僕射封魏國公凡四舉士多知名人服其鑒卒年八十八贈太尉謚文懿起性友悌居播喪哀戚加於人尤嗜學非寢食不輟廢

辛讜傳具武勲

南唐徐鍇字楚金與兄鉉齊名友愛最篤常共用墨一圭兄弟每並馬出入弟馬未歸兄馬不肯茹草兄出弟馬一如之鉉以直諫被逐鍇涕泣思念至病狂其母請

江都縣志

卷之十五

鄉賢

八

於李主曰法有兄弟相及罪今願鍇與鉉俱貶以緩其疾李主哀之爲召鉉鉉還而鍇病已昏瞶不識人家入反復告之鍇猶記兄背有黑痣子撫摩得之遂抱持吮其痣號慟幾至氣絕鍇第進士累官屯田郎中知制誥集賢殿學士改官名內史舍人著有說文通釋方輿記古今國典賦苑歲時廣記及他書數百卷卒謚曰文

宋張方平字安道其先宋人徙揚州少英秀年十三母撫之曰揚州俗浮薄睢陽鄉里有庠序吾弟爲之領袖盍徃依之割情以遣旣至就舅氏學業大進舉茂材異等又舉賢良方正遷著作佐郎通判睦州嘗召試館職

命直集賢院俄知諫院夏人寇邊方平首乞合樞密之職于中書以通謀議帝然之遂以宰相兼樞密使西師久未解方平言願因郊赦開其自新之路帝喜改慶厯赦元昊竟降既使契丹還知制誥權知開封府府事叢集方平獨默記決遣無少差忘拜御史中丞判太常寺以侍讀學士知益州或扇言儂智高在南詔將入寇攝守亟調兵築城民大驚擾朝廷發陝西步騎往戍蜀詔趣方平行方平曰此必妄也道遇戍卒皆遣歸他役盡罷上元張燈城門三夕不閉得邛部始造此語者梟首境上而流其餘黨蜀人遂安嘗畫上十四策富弼讀其江都縣志

卷之十五

鄉賢

九

奏漏盡十刻帝稱善弼曰此國計大本非常奏也悉如其說行之英宗時遷禮部尚書爲學士承旨帝不豫召至福甯殿帝憑几言言不可辨方平進筆請乃書云明日降詔立皇太子方平抗聲曰必穎王也嫡長而賢請書其名帝力疾書之乃退草制神宗時王安石行新法方平極論其害帝聞憮然哲宗立加太子太保薨年八十五贈司空謚文定

孫錫字昌齡天聖二年進士授巢縣主簿改鎮江軍節度推官知仁和縣撫下仁恕以父喪去三年舉充國子監直講改著作佐郎遷開封府推官嘗同判尚書刑部

奏赦逮繫親屬在獄者一百二十三人又隨尹奏開封
當改者數事上然之道士趙清貺出入宰相龐籍家受
昧下府勘實坐杖配沙門島行兩日死御史劾府希宰
相旨故杖殺清貺以滅口仁宗疑之悉罷知府推判官
以錫知太平州然清貺事獨判官王礪所決錫不自辨
未幾仁宗悟非其罪復以錫提點淮南南路刑獄活大辟
十三人考課爲天下第一召爲三司戶部判官求知宣
州許之召五縣令約以州所下書有不便封還尋知舒
州發常平廣惠倉以活陳許汝穎蔡流人及歸計口量
遠近給食遣之去者率錢買香焚於府門比代去州人

闔城門留之官至尚書度支郎中以老致仕神宗卽位
遷司封賜金紫卒年七十八有文集二十卷

呂溱字濟叔寶元中進士第一直集賢院同修起居注
出知蘄楚舒三州進知制誥又出知杭州入爲翰林學
士疏論宰相陳執中姦邪仁宗還其疏溱曰願出以示
執中使得自辨執中去溱亦以學士知徐州賜宴資善
堂遣使諭曰此特爲卿設宜盡醉也徙成德軍時方開
六塔河宰相主其議會地震溱請罷之以答天戒後以
龍圖閣直學士知開封府辨訟立斷豪惡斂跡已而病
卒年五十五贈禮部侍郎帝悼念之詔官優給賻禮官

庀其葬溱開敏善議論一時名輩皆推許然自貴重在杭州接賓客不過數語時目爲七字舍人云

孫洙字巨源錫之子羈卯能文未冠擢進士包拯歐陽修吳奎舉應制科進策五十篇指陳政體明白剴切韓琦讀之太息曰今之買誼也再遷集賢校理知太常禮院治平中求言洙疏時弊要務十七事後多施行兼史館檢討同知諫院乞增諫員以廣言路王安石主新法多逐諫官御史洙乃力求補外得知海州免役法行常平使者欲加歛緡錢以取贏爲功洙力爭之方春旱發運使調民濬漕渠以通鹽河洙持之不下三上奏乞止

江都縣志

卷之十五

鄉賢

十一

其役旱蝗禱胸山徹奠大雨蝗赴海死尋幹當三班院三班員功罪籍不明吏爲姦欺洙革其甚者八事定爲令同修起居注進知制誥洙言遷叙不宜用一定之詞詔自今封贈蔭補每大禮一易他皆隨等撰定元豐初兼直學士院澶州河平詔作靈津廟碑神宗獎其文擢翰林學士纔踰月得疾時叅知政事闕帝將用之數遣中使尚醫勞問竟卒年四十九帝臨朝嗟惜常賻外賜錢五十萬洙博聞強識明練典故雖對親狎者未嘗發一鄙語文詞典麗有西漢之風士大夫共以丞輔期之不幸早世一時憫傷焉

孫馨字叔靜錢塘人父直言徙揚之江都馨年十五遊太學蘇洵濬甫稱之調越州司法叅軍守趙抃薦其材知偃師縣韓縝鎮長安辟入府召對擢提舉廣東常平徽宗初由福建轉運判官召爲屯田員外初馨與蔡京善常言京才勝德恐貽天下憂至是京還朝遇諸塗逆謂曰我若用於天子願助我馨曰公誠能謹守祖宗之法以正論輔人主示節儉以先百吏而絕口不言兵天下幸甚馨何爲者京默然既出提點江東刑獄未幾入爲少府少監戶部郎中時縣官用度無藝馨與尚書共疏論之當國者不樂徙馨開封遷太僕卿殿中少監四

輔建以顯謨閣待制知曹州論經始規畫之勞轉太中大夫徙鄆州邑人爲草祭之誣指切蔡京馨以聞京怒使言者誣以他事罷提舉鴻慶宮起知單州遂致仕靖康二年卒年八十六贈銀青光祿大夫謚曰通靖馨篤於行義在廣東時蘇軾謫居惠州極意與周旋二子娶晁補之黃庭堅女黨事起家人危懼馨一無所顧時人稱之

王昂少以文學知名政和八年廷策進士嘉王楷第一上不欲以王子魁多士擢昂置榜首除秘書省校書郎宣和元年昂言今後除卿監未經上殿者乞合如郎官

之法並令閣門引見從之高宗卽位除尚書工部員外郎遷起居舍人秘書少監時御府頒降書籍四百九十二種曾敎家藏書二千六百餘卷昂請分爲經史子集四庫委官校讐其脫落譌舛者以別本參考補寫畢則繳進除徽猷閣待制知台州尋奉祠卒

王居正字剛中熙甯中王安石以新經義頒天下居正獨非之曰窮達自有時心之是非可改耶十餘年不應舉宣和二年始第進士考官黃得濟得其文曰王佐才也欲擢爲首他考官持之置次選以范宗尹薦命對便殿上甚說高宗初居正次前世聽納事爲集諫十五卷

江都縣志

卷之十五

鄉賢

三

并請省費等務數千言以上一日於上前論秦檜曰檜前自言他日爲相當聳動天下今所措注止是願以臣言詰檜檜聞而銜之出居正知婺州州歲貢羅萬疋漸增至五萬疋居正疏五不可上如居正請減其半州貢炭膚埋非胡桃紋鶉鴒色者不中程居正疏止之召爲中書舍人兼史館修撰大將張俊遣卒至彭城恃勢辱合合郭彥恭搢之俊訴於朝居正言彥恭不畏強禦無可罪和州請蠲進奉大禮絹居正言進奉乃臣子享上之誠察民力所無從出當預降旨蠲之使其自陳已非是乞速如所請救弊補闕所還制勅甚衆其後檜益專

國居正知不爲所容請祠言不及時事檜終忌之諷中丞何鑄劾居正爲趙鼎汲引奪職凡十年檜死復故職居正根柢六經以崇是闢非爲已任黜王氏之說嘗與楊時會毘陵時出所著三經義辨示居正曰吾舉其端子成吾志於是愈感勵積十餘年爲毛詩辨學十三卷詩辨學二十卷周禮辨學五卷辨學外集二卷又竹西集十卷西垣集五卷

李易字順之好學多聞以清素見稱建炎初高宗駐蹕維揚策試進士易爲第一以上憂勞辭聞喜宴從之授僉書江陰軍判官會金人至夏港距城數里守臣胡紡江都縣志

卷之十五

鄉賢

十四

謂易曰吾曹當死城郭君有母宜急避之易歸告其母蔣氏母曰我去則汝必無意堅守死生當與汝同之由是易守益固金人亦引去紹興元年爲太常博士韓世忠辟易叅謀轉工部員外郎爲太常寺少卿自建炎維揚之變宗正寺所掌圖牒皆逸於江湖至是易請編次玉牒從之遷中書舍人改直秘閣知揚州易以本貫辭不許官至敷文閣待制隨奉祠卒於秀州

李衡字彥平高祖昭素仕至侍御史衡紹興中登進士第授吳江主簿有部使者怙勢作威投劾歸起知溧陽縣榜夏秋二稅期日於縣門鄉無吏迹而輸送先他邑

辦終任未嘗繫一重囚隆興二年金兵至淮堧官沿江者多送其孥衡獨自浙右移家入縣民心大安盜蝟起旁境而溧陽獨靖宴轉運使等列上治狀召入爲監察御史歷司封郎中樞密院檢詳出知溫婺台三州加直秘閣而衡引年乞身上累郤其奏除秘閣修撰致仕上思其樸忠旋召落致仕除侍御史以老固辭不獲命差同知貢舉會外戚張說以節度使掌兵柄衡力疏其事謂不當以母后肺腑爲人擇官廷爭移時改除起居郎請老愈力上知不可奪仍以秘撰致仕衡後定居崑山結茅別墅聚書萬卷號曰樂庵卒年七十九衡自宣和江都縣志

卷之十五

鄉賢

五

間入辟雍同舍有趙孝孫者洛人也其父實師程頤勸衡讀論語曰學非記誦詞章之謂所以學聖賢也不可有絲毫僞飾處方可以言學衡心佩其訓雖博通群書而以論語爲根本臨歿沐浴冠櫛翛然而逝周必大聞之曰世謂潛心釋氏乃能達死生衡非逃儒入釋者而臨終超然如此殆幾孔門所謂聞道者歟

牛大年字隆叟邑之邵伯人慶元二年進士歷官將作監主簿入對言人主當以天命人心之所繫致念又言今日士氣久靡宜振起之夫有扶持作興之意而後搢紳無貪名嗜利之習無貪名嗜利之習而後有持正秉

義之操言多剴切遷軍器監主簿歷進直寶章閣爲工部郎官入對請懲貪吏累升秘書監起居郎兼崇政殿說書以寶章閣待制提舉太平興國宮卒特贈四官大年清操凜然所至以廉潔自將

姓譜云大年知黎州治鎧甲增料錢以優郡兵

會大水卽以私帑賑民比還朝一夫荷擔而已郡人歌之

元李茂大名人徙家揚州父興壽臨卒語茂曰我病且死爾善事母茂泣受命奉母益謹母嘗病目失明茂步禱於泰山三年復明又每夕祝天乞損己年益母壽母孟氏年八十四歿居喪哀慟聞者傷之大德九年揚州火燒千餘家已至茂廬忽風返火滅事聞旌之

江都縣志

卷之十五

鄉賢

六

明陳琰字公信負時望洪武間貢入太學授監察御史巡按雲南每出解見東家烟突出人手作招訴狀心知其有冤猝召其家督錮之而搜檢其家物得江西估客路引一紙乃出訊之曰爾前者沒估客財而殺之匿其屍竈下今露矣其人卽伏罪時詫其神歷陝西左布政使多惠政以忤藩邸歸

張曦字景芳景泰間以例貢爲攸縣令民素梗曦以躬行化導之絕餽納寬徭稅雪誣枉數年乞歸民爲立生祠以彰其愛家居益崇清儉一時靡俗知警愧云

張冕字汝端天順己卯舉人同知台州府官俸外一蔬

不擾於民衙署清肅其謁無收入考滿增四品俸復任
五年比歸家人誤持官釜入舟至中途始覺急還之遷
徽江知府操履益峻後家居巡使畢亨知其貧以金遺
之固辭不受

馬岱字伯瞻成化丙戌進士初任戶曹會計出入人莫
敢欺後知泉州府泉民有數世不葬其親者岱至諭以
禮旬月葬以千計僧以尼爲下院岱罪其尤者餘尼以
配平民識者服其重風化內艱解任行李蕭然性剛峭
好面折人過不避權貴人憚而怨之然守正嫉邪論者
謂亦古之矜也

江都縣志

卷之十五

鄉賢

七

高銓字宗遺成化己丑進士始入仕或勸增年以就臺
諫謝不可爲河南按察使風紀整肅歸德有黃河退地
千餘頃爲親藩所據上命中使與銓驗實銓排中官議
還諸民陞左布政使治行異等以左副都御史巡撫保
定有奸民獻民田爲皇莊者侍郎許進奉命會勘寃聲
撼野至殿州縣吏不得行進遽欲以小民寃狀聞銓曰
此固爲民至意萬一不測如重民罪何請第勘實以聞
上雅愛民必不忍奪其生奏上果然張秋河決上治河
十二議正德中爲南戶部尚書忤劉瑾致仕逮獄瑾誅
復官銓精通律令自謂治律之功不減治經史推挽名

下後進不遺餘力退位家居雖鄉黨小吏來謁亦必公服迎送鄉人頌之卒賜祭葬

左唐字堯卿宏治丙辰進士爲廣東叅政署司篆吏無所容奸恨欲撓之會查盤使者至所盤計鉅萬獨羨餘百金訝其少詰守藏者皆曰事山署印叅政使者弗審徑以論唐唐忿而病僚友慰之拊膺曰平生砥礪名節顧乃蒙垢若此遂不食而死同寅並藩臬會呈撫按言唐寃巡按爲覆盤庫則應有羨餘故在實不止百金將奏雪之以唐喪歸乃止唐性廉介以官爲家不問生產比喪歸囊橐蕭然倫以訓爲誌墓且書其寃

王軌字戴卿宏治十二年進士初爲戶部主事監崇文門太監蕭敬家奴隱稅執而訊之忽健卒數十人擁奪去敬以告尚書侶鍾鍾笑曰乳犢甯知畏虎耶陞員外郎命視直隸閩浙倉庫時劉瑾怙權每使還必有所獻軌獨否瑾怒令科道覆覈卒亦無可加罪改工部員外監遵化鐵冶瑾黨致書爲炭戶請託且恐以危言軌欲劾奏之會瑾敗乃已累遷山東左布政嘉靖初入爲順天府尹時內官迎進大祀神牲需求無厭軌奏其生事害民權璫懼焉房山地震軌言召災有由語多指斥忤旨切責尋遷右副都御史巡撫四川芒部土知府隴慰

死庶子政與嫡子壽爭立朝議立壽政怒使人誘殺壽奪其印軌乃會貴州兵擒政於水西璽書獎勞爲戶部右侍郎覈九門首蓄地以餘地歸之民勘御馬監草場釐地二萬餘頃募民以佃房山民以牧馬地獻中官韋恒軌釐歸之官奸人馮賢等復獻中官李秀秀爲請於帝軌抗疏劾之竟治賢等如律覈勦戚莊田請如周制計品秩別親疎以定多寡非詔賜而隱占者俱追斷戶部尚書梁材採其言兼并者悉歸官稍進左侍郎罷歸以兵部尚書李承勛薦起故官總督倉場再遷南京戶部尚書改兵部詔舉將材薦鄭卿沈希儀等二十一人

江都縣志

卷之十五

鄉賢

十九

皆擢用居四年以老乞罷久之卒

舊志稱軌性至孝爲諸生時父病思柿不

得遂終身不食柿

葉相字良臣宏治壬戌進士初司理金華平獄均賦郡民戴之入爲給事中時劉瑾擅政中外無敢言相首疏劾瑾又上建儲及漕運庫藏等十餘疏皆剴切識治體因忤仇鸞出叅政貴州歷江西布政使已復擢貴州巡撫會芒部構亂相討平之賜鏹幣擢戶部侍郎尋以病予告久之起補刑部侍郎終三年不調或諷以賂主爵者相笑曰有納粟尚書耶尋予告歸築迂隱園以老卒賜葬祭贈右副都御使祠鄉賢子曉以廕授南京中府

都事

盛儀字德璋宏治乙丑進士觀吏部政時劉瑾以事干尚書託儀致書儀拒不許以是知名授禮部主事改監察御史時文體日靡儀請崇濂洛之學以挽士習陞山東按察副使勦商河巨盜寬夫役之困東人戴之遷雲南叅政察屯務清宿蠹尋陞湖廣按察使督修顯陵多所節省又活饑民萬計入爲太僕寺卿立解馬法遂著爲令儀歷官以清峻著名及致仕歸橐無餘貲薄田儉廬僅足自給尤篤於孝友兄弟終身同居卒祀鄉賢所著有維揚志二十卷儀初學於章懋鄉人咸推其學術

江都縣志

卷之十五

鄉賢

三

醕正無悖於程朱云

趙鶴字叔鳴瓜洲人宏治丙辰進士授戶部主事爲尚書侶鍾所知壬戌天下大祲鶴代草上寬恤事宜詔文武大臣會議蠲諸不急著爲例陞本部郎中督永平山海薊州糧草兼視屯田條上邊場急務十六事又以徵收豆草積久腐敗奏請折價貯庫臨時和糴以給軍需其古北口等倉儲不足以供遊兵請更番操練有警調發自是邊儲賴焉正德初陞建昌知府益府軍校有恣橫虐民者捕置之法所部肅然闔瑾以規賂不得搜薊州耗糧事左遷南安同知尋擢金華知府在郡疏請廣

折徵寬加派備積貯禁溺女諸事錄東萊北山魯齋仁山白雲五先生遺書爲正學編集范香溪以下諸家爲金華文統集劉孝標駱賓王舒元興及近世四十餘人爲文統拾遺表范文簡潘默存之里皆正俗誠民之要擢山東提學副使或以其約士過嚴爲蜚語謗之卽上疏乞致仕歸築精舍江滸日夕嘯詠其中嘗編維揚郡乘著具區文集若干卷

徐昂字文舉宏治丙辰進士授兵科給事中屢疏陳治道及論邊備皆切中時務正德初劉瑾引用其黨馬永成谷大用等八人戶部尚書韓文抗疏暴瑾罪惡瑾矯

江都縣志

卷之十五

鄉賢

三

旨罷文昂疏言文厯官年久端謹素著國家倚以爲重不宜罷瑾矯旨并奪昂官嘉靖初卹錄舊臣起昂爲廣東右叅議昂初無子就王生相生日君今年登第但不宜子後在西安途中買一妾詢之乃良家子卽焚券爲擇配秩滿如京師相者迎謂曰君相頓異可得子矣後數歲果育五子

沈珠字汝淵中正德丙子鄉試卒業南雍從祭酒湛若水游授體認天理之學學漸進授永新令著異政陞南京國子監丞無何解組歸里初湛若水徒滿四方而珠爲都講迨老益洞徹真體一時並宗其學稱艾陵先生

高遷字升之銓從子正德辛巳進士授甯波府推官攝
郡事會日本貢使構亂遷討平之陞戶部主事員外郎
督糧通州值邊警歲漕四百萬石無缺陞郎中尋知順
德府時車駕幸承天道出順德遷抵任甫及旬區畫供
帳無不立辦城沙河工竣陞河南按察司副使會河決
睢州野雞岡奉勅治之遷爲鑿孫繼口塞河二百二十
五里以疏橫流復扈運口九十里上遣兵部侍郎王以
旂視其役薦遷勞績第一明年益發民濬三河未深者
漕運賴之詔增俸一級百姓肖像祀焉所著有南兗州
集順德府志

江都縣志

卷之十五

鄉賢

三

蔣應奎字文煥先世故江都人以永樂初戍大同遂家
大同嘉靖乙酉舉山西鄉試丙戌成進士授工部主事
分司呂梁陞郎中改營繕司董九廟慈慶慈甯諸大工
告成賜銀幣陞太僕少卿久之陞應天府尹時鎮田萬
畝荒弗治稅悉徵之里人應奎親往勘爲出金築堤召
民開墾成腴田以免里人困累至今便之陞都察院右
副都御史巡撫遼東請發內帑築邊牆二百餘里僅四
月竣工省費萬計陞兵部右侍郎協理京營戎政致仕
歸江都行李蕭然性嗜學手不釋卷語天下事歷歷如
指掌清修鯁介其天性也卒葬江都之馬鞍山

曾銑字子重嘉靖己丑進士初知長樂縣擢御史巡按遼東遼陽兵辱撫臣呂經爲亂銑急檄副總兵罷經苛急事爲亂軍乞赦而刺得爲惡者數十人姓名同日捕獲上言爲亂首惡宜急誅乃悉坐斬懸首諸城全遼大定擢銑大理寺丞遷右僉都御史巡撫山東俺答數入內地銑請築臨清外城工畢進副都御史居三年改撫山西經歲寇不犯邊進兵部侍郎二十五年夏總督陝西三邊軍務寇十萬餘騎由甯塞營入大掠延安慶陽銑率兵數千駐塞門而遣前叅將李珍搃寇巢於馬梁山陰斬首百餘級寇聞之遁時套寇牧近塞居民不敢

樵採銑方築塞慮爲所擾乃選銳卒擊之寇稍北間以輕騎入掠銑復率諸軍驅之遠徙詔增銑俸賜銀幣有加銑念寇居河套久爲中國患上疏請以銳卒六萬鎗手二千每歲春夏交攜五十日餉水陸交進直搗其巢爲一勞永逸之策條八議以進是時銑欲西自定邊營東至黃甫川一千五百里築邊牆請帑金數十萬期三年畢功疏並下兵部部臣難之詔曰銑倡恢復議甚壯其令銑與諸鎮臣悉心上方畧予修邊費二十萬銑乃益銳合諸臣條上方畧十八事已又獻營陣八圖並優旨下廷議廷臣見上意向銑一如銑言輔臣夏言欲倚

以成大功主之甚力嚴嵩與言有隙欲借事傾言乃極
言套必不可復陰詆言以激帝怒旋復顯攻言謂向擬
旨褒銑臣皆不與聞兵部尚書王以旂會廷臣覆奏遂
盡反前說言套不可復帝乃遣官逮銑然無意殺之也
會咸甯侯仇鸞鎮甘肅以驕恣爲銑所劾逮嵩故雅親
鸞乃代鸞獄中草疏誣銑掩敗不奏尅軍餉鉅萬遣子
涪屬所親賂當途其言絕無左驗乃竟擬斬卽日行刑
銑旣歿家無餘貲隆慶初給事中辛自修御史王好問
訟銑冤詔贈兵部尚書諡襄愍賜祭葬廕子汴判應天
孫之省判南康府

桑喬字子木嘉靖壬辰進士授戶部主事督草場稅宿
弊頓清改監察御史按山西時大同初定渾源失守邊
民被傷者甚衆喬躬行塞上掩骼埋胔劾將臣魯剛季
懋輩失機正法州邑被兵殘破者疏免其征賦又諫止
車駕毋巡邊及籌邊方畧十餘條代還適奉天殿災陳
時政并劾禮部尚書嚴嵩兵部尚書張讚戶部尚書張
雲工部尚書林廷楫詔罷雲廷楫而留嵩讚時帝方眷
注嵩而喬疏論之且連四大臣直聲震天下嵩大銜恨
已亥上幸承天疏請留不允扈行在改巡按順天會遭
寒疾疏乞骸骨歸嵩授指都御史王廷相令劾喬規避

廷相素重喬不卽上嵩曰上怒且相及矣會經歷李鐔
譖喬短廷相遂奏論喬逮赴詔獄廷杖幾死謫戍九江
二十六年不歸念母老治廬迎養母後歸江都喬獨居
一室惟一僕供掃除汲爨而已嗜易占得其微奧所著
有廬山記二十卷真詮四卷詩文二十卷卒於戍所隆
慶初奉遺詔贈光祿寺少卿

李承式字敬甫其先世自大同遷江都嘉靖丙辰成進
士初任錢塘知縣以執法忤繼使者調深澤除奸吏稱
神明擢兵部主事上封事八條皆報可尋備兵榆林法
令嚴整壁壘一新陞陝西布政使以疾辭歸會倭犯朝
鮮以承式有邊才名用多立軍功陞福建左布政使尋
致仕惟汙萊數頃以供餽粥築一室湖上扁舟往來足
不履城市卒祀鄉賢子植子柄同祀鄉賢各有傳杜禮
部郎中

江都縣志

卷之十五

鄉賢

五

鄒應龍字雲卿陝西蘭州人隨父家江都初名貫補郡
諸生尋易名中嘉靖乙卯陝西鄉試丙辰成進士山行
人擢御史劾嚴嵩及其子世蕃欺罔不法事十餘條時
嵩父子威勢熏灼言者輒死應龍疏上卽勒嵩致仕下
世蕃等詔獄天下快之應龍擢通政司叅議歷遷至兵
部右侍郎隆慶初巡撫雲南至卽劾黔國公沐朝弼不

法事竟逮問奪爵入爲都御史萬厯初劾太監馮保僭肆保陰中之令致仕言者旋以其征洞獠謂開邊釁遂削籍卒陝西巡撫王璇疏稱應龍沒後遺田不及數畝遺址不過數楹卹典未報朝野所恨詔復原官予祭葬陝西及揚州俱祀之鄉賢

李樹敏以選貢授嘉善丞修築海隄著有勞績再補安福丞時值均田敏自治食具出入阡陌不以煩民除夕有餽豚蹄者家人受之業就鼎矣令絜以還之其清介類此卒於官士民皆垂涕祀之名宦

李植字汝培承式子萬厯丁丑進士改庶吉士授監察

江都縣志

卷之十五

鄉賢

五

御史十年冬張居正卒馮保猶用事其黨錦衣指揮同知徐爵居禁中爲閱章奏擬詔旨如故居正黨率倚爵以自結於保御史江東之首暴爵奸植遂發保十二大罪抗疏乘間投甌朝退同列稍聞其事至噤汗反走上覽奏震怒夜半出中旨逐保籍其家明年植巡按畿輔請寬居正所定百官乘驛之禁從之時上欲並籍居正家居正雖剛愎自恣實未黷貨卽攻之者亦知其冤而不敢辨植獨言故相張居正爵可削家不當籍人服其公上亦以盡忠言事褒之手詔吏部擢植太僕寺少卿廷臣益忌植適帝欲卜壽宮於大峪山植謂其地未善

御史柯挺自言習葬法力稱大峪之美給事中王敬民等又迭疏攻植遂貶植綏德知州引疾歸居十年起沅州知州累官右僉都御史巡撫遼東植墾土積粟得田四萬畝歲獲糧萬石戶部推其法於九邊又奏稅監高淮貪暴請召還不報後乞休家居卒贈兵部右侍郎陳輔堯傳具忠節

宗名世字良弼興化人居江都萬厯己丑進士任紹興教授行至夢筆橋夜泊夢江淹授以綵筆三日俾爾三世享文名秩滿陞肥鄉令以簡靜鎮俗邑人德之陞工部主事以病乞歸卒所著有蒙史畧含香堂文集子萬江都縣志

卷之十五

鄉賢

七

化中己酉北直鄉試仕潮州同知灝癸未進士孫元豫元鼎觀俱有文名

鄭茂華字實符萬厯甲辰進士由部郎出爲浙江按察副使時溫處多寇茂華至皆望風遁進廣西布政使廉潔不侵一緡時靖藩爭立三司慮變華諭以大義立解天啟間魏璫煽虐所在立生祠華獨令廣西不應其強項如此崇禎初舉卓異召對平臺稱旨陞副都御史巡撫廣西有土司陰謀起釁華指授方畧殲其渠魁諸桀驚者咸遵約束考績晉通議大夫御書天下清官於屏尋命攝兩廣總督以病乞休溫詔慰留者再歸里杜門

未嘗營田宅卒贈正議大夫兵部侍郎廣西祀名宦
馬呈秀字君實其先大同人隨父業鹽筴籍江都呈秀
早孤嗜學登萬曆甲辰進士未拜官卽疏請終養服除
官大理寺評事凡奏疏諸牘援引經傳同列悚服出知
延安徇賊入境親督兵捕擊擒其渠魁治延五年收復
流民萬戶墾荒田數萬畝八其租爲民充逋賦尚書趙
彥稱之陞福建按察司副使擒礦盜有功祀福建名宦
史啟元字蓋卿萬曆甲辰進士授南戶部督淮閘稅尋
移南吏部天啟初擢湖廣按察副使備兵衡永會岷藩
有變中使往勘羣宗謹甚啟元至數語折服遂定岷封

江都縣志

卷之十五

鄉賢

天

粵寇闖八楚境啟元於廣贛孔道設木蘭臘嶺二關募
兵守之賊不得奔逸殲其渠魁脅從解散境內獲安被
病乞休歸臥林下嗜書臨池不輟年八十卒祀郡鄉賢
蕭灼如字茹一由選貢授廣東潮州通判職司糧民多
逋賦灼如盡爲請免歲饑捐賑存活甚衆巡按周應期
知其才所至以灼如從凡有疑難詢之立剖潮關有稅
亦命其代理灼如設厓中庭令自投其中不問羨餘巡
按益重之將疏薦會灼如以積勞得疾告休卒

王納諫字聖俞一字觀濤萬曆癸卯鄉試第一時陶望
齡主試王思任分校得人稱最盛丁未成進士授行人

出使榮藩辭樂郤餽榮世子敬禮之以疾假歸家居二載吏部司官缺人爭營之尚書某曰吾知有下帷著書不干進者王君可任也起爲吏部主事力疾赴召五閱月厯四司疾益甚復請告歸田里匝月而逝所註四書翼註學者皆宗之子玉藻崇禎癸未進士

高邦佐傳具忠節

郝景春傳具忠節

劉有綸字耿邦先世河津人以鹽筴籍江都兄弟八人登乙榜者三綸爲孝廉三十餘年安貧守道不入公府遠近弟子負笈者甚衆嘗爲當事籌軍國邊儲悉得要江都縣志

卷之十五

鄉賢

五

領所著有上葉相公言當世要務書及三忠詩文誠明緒言鹽法條議子梁嵩另有傳

李柄字明衡承式子天啟壬戌進士初授中書科舍人擢監察御史按兩浙修築海塘越人多受其賜繼復巡按雲南撫綏普酋邊陲賴以永定勤勞王事竟卒於官李通字伯經性誠恪幼失怙爲諸生言規行矩鄉曲奉爲坊表生平慕王良之學以道爲己任天啟癸亥禮部徵通預纂萬厯泰昌兩朝實錄以特恩授廣安州佐受知當事及去任州士民肖像祀之

高孝誌傳具忠節

徐明孺內行克修動循禮度訓其子葆初績學砥節用
成名賢鄉里無不稱爲潛德君子

國朝陳卓字懋修順治丁亥進士由刑部郎遷四川提學
僉事時蜀新定諸生文業荒廢卓出所攜經籍令傳寫
轉相教授由是文風日振按試保甯府值劇賊劉文秀
猝至卓乘城分守拒却之叙功擢陝西臨鞏道副使覈
驛傳侵漁之弊復官商分茶之法辨部民受逆狃僞劄
者民咸德之再擢湖廣上荆南道叅政告歸鄉里矜式
焉

李濂字長源明大中丞植之孫性端凝篤學力行雖華
江都縣志 卷之十五 鄉賢 三
胄淡若寒素子宗孔成進士猶挾策應舉子試與人交
重然諾苟非其義一介不取鄉里以此重之子宗孔別
有傳

戴廷徽字山子江都人占籍萊州由順治乙酉恩貢授
福建汀州司理 王師定閩以才能調補甯德令禁軍
士搶掠凡被執婦女悉勒還招撫賑恤給牛勸耕葺城
垣興學校士民得以樂業有報德者密於米炭中裹金
以餽力卻之制府張存仁薦調建陽會建陽失守波及
之民人爲罷市懇臺省再補粵東之吳川令以母老請
終養歸卽不復仕進以己產所入分贍宗族嫻黨老少

咸安懷之卒祀郡鄉賢甯建兩邑亦祀名宦閱六十年
子夢麟主福建戊子鄉試甯人觀嘆道旁仍有焚香獻
酒醴者

鄭俠如字士介其先歛人徙於揚遂隸江都生而才藻
過人受知於廖司理貢入成均授工部司務時有奏開
煤山者執政持兩可俠如以爭利擾民力請已之又工
曹所屬器甲日久多窳敗俠如捐貲整飭一夕頓新大
司空異之謝職家居杜門課子以孝友端方爲鄉里推
重祀郡鄉賢

高孝健字體乾世有令德孝健誠愿端謹以禮義自閑
江都縣志 卷之十五 鄉賢 三
爲鄉里所取範子以位另有傳

許明賢字仲容先世自歛徙揚遂家焉讀書探性命之
旨存誠主敬恥爲章句俗學性至孝親意少不愜輒露
立永夜不就寢嘗隨父歸歛展墓比返回首故鄉潸然
出涕伏臘祭祀器具必親興俯必謹雖衰年未嘗少懈
生平素行善如賑饑焚券完人婚嫁勇爲之不倦歲甲
申率諸子避地金陵見所攜載時文曰此無益悉沈之
江命箋經輯史纂述名臣奏議以備異日實用諸子皆
克成其志三舉鄉飲大賓祀府學鄉賢

鄭爲光字晦中本歛人世居江都父俠如明末官工部

司務有才能爲光登順治己亥進士改庶吉士授監察御史巡視中城能禁強橫出冤獄以州縣賦稅叢弊請設循環簿稽之剔揚州關鈔積弊及請科舉廣額收推升實效節鳳米浮費諸疏皆報可卒於官祀郡鄉賢程銓徽州歙縣人占籍江都有君陳孝友之行睦嫻任恤尤能篤義於鄰族間恥世儒徒飾虛文不敦實誼謂非爲己之學也讀書必究儒先宗旨採集諸先哲嘉言懿行勒爲編又嘗於城南建義塾教近郊子弟之可造就者子濬登進士第官中書科舍人時封銓如其官濬另有傳

江都縣志

卷之十五

鄉賢

三

許承宗字念修父明賢由徽徙家於揚遂爲江都人以義行祀鄉賢承宗生有至性母歿於家中落時稱貸數百金治棺附猶以無財不可爲悅抱隱慟焉弟承宣承家有盛名承宗所以誘掖而成就之者無不至旣治淮漕凡歲荒必首倡賑恤出重金以爲之先厯計所輸者積久至數十萬鄉人德之

許承宣字力臣康熙丙辰進士選庶吉士授工科給事中首陳揚州水利賦役二疏剴切詳明有裨桑梓辛酉典陝西鄉試還京條奏晉開利弊六事上之並請廣捐修學宮之例悉見嘉納後假歸卒於家雍正五年五月

世宗舉承宣向所上水利一疏傳問揚人之仕京師者旋下江南督撫酌行之先是承宣父明賢祀府學鄉賢康熙三十九年與兄承宗並祀縣學

張瑾字去瑕康熙癸卯舉於鄉除知雲南昆明縣時吳逆平未久民仍艱業瑾爲給牛種招墾荒地請開白沙清水馬裏三河灌之又於近郊三十里令種桑柘民資其利聽訟立折凡他郡有疑獄不決者上官悉下瑾理之滿三載將行取卒於官百姓哀號送其喪者數萬人祀昆明名宦

閔世璋字象南本歙人世居江都自奉唯老屋數椽布

江都縣志

卷之十五

鄉賢

三

衣蔬食而遇族黨貧老孤獨者竭力周之葺學宮新聖賢像歲禮設法捐賑全活甚多通郡皆稱爲善人四舉鄉飲大賓卒祀鄉賢其所創育嬰堂規畫周詳至今因之子寬孫長虹曾孫廷佐皆克紹其志

鄭爲旭字方旦本歙人世居江都順治辛卯拔貢授中書遷工部主事權廣東太平橋稅減耗恤商擢監察御史巡視東北兩城多所建白如選官須加驗看視學應遣詞臣申講讀律令之條以厚民俗分進士舉貢援例班次以疏銓政飭臬司遇命案不得率結罪人發烏喇臧等者卽中途遇赦并在部未結諸人皆應照例寬恤

等疏俱次第舉行卒祀郡鄉賢

雷士俊傳具隱逸

李茂字子榮幼時父摩其頂曰是兒體骨不凡待鬚長必成令器後果鬚長尺許而父已亡茂悲父不及見每顧輒泣偶脫卽檢貯囊中且撰惜鬚記以紀之婚時青袍母手製也每祭必服而拜且拜且泣臨終遺命以青袍鬚囊殉焉性友愛與昆弟終身式好教子孫崇勤儉嘗客漢口人烟稠密多迫於火災無可出避茂購民舍闢大巷名曰永甯全活甚衆至今德之子衡康熙癸巳經魁另有傳

江都縣志

卷之十五

鄉賢

三

金玉節廩生乙酉揚州罹兵燹時親歿未及葬玉節穴室中地瘞之封未完一卒至疑所瘞者金也將斫棺玉節匍匐伏棺上大呼以身翼之復跪守土穴八晝夜得免兵燹甫定有少婦美姿容投之曰避亂至此乞相依爲命玉節使家人禮接之訪得其夫令攜歸又嘗館史氏家史以積金數十封藏其笥史旋罹於難玉節召其家人還焉玉節生平以主敬存誠爲學著有四書解十六卷小學闡證十卷批點性理四十卷卒祀鄉賢子奇選彥選亦從祀

金奇選字幼常邑增生玉節子當玉節伏護母柩時奇

選方九齡跪泣持卒刃卒曰小兒不畏死耶掠之繫馬上至城南善慶菴菴僧先夢神語救小孝子及見奇選因爲卒述其夢卒亦憐焉遂捨而去僧訪送其家里中咸驚嘆爲異長而淬厲於學尤攻孝經小學性理三書爲文能得儒先精諦而聲律身度則尤粹然其無遺行焉歿之日其門弟子私謚孝安先生康熙四十四年與父玉節同祀鄉賢子門詔癸丑進士選庶吉士殿詔乙酉舉人

金彥選字聖鄰邑增生玉節次子金氏以孝友世其家彥選內行克修窮經績學士林咸矜式之教人則秉先

江都縣志

卷之十五

鄉賢

三

詰遺範從游者不敢軼規矩嫂早歿兄奇選義不再娶其子女皆彥選所撫育而成就也生平尤勇於爲義如贖被掠八旗之子女賑水荒飯窮餓皆力倡同志遠近推爲長者歿而從父兄附祀瞽宗物論愜焉